

**ATASSUT****UKA 2016/82****Siverth K. Heilmann****18. 10. 2016**

**Inatsisartut aalajangiiffigisassaattut siunnersuutigineqarpoq, Naalackersuisut peqquneqassasut danskit inatsisit atortinneranut ministerianut attaveqassasut Kalaallit Nunaanni Eqqartuussiveqarneq pillugu Inatsip allangortinneqarnissaa pillugu. Allanguut periarfissaqartitsilissaq hashimik aamma allatigut peqqarniitsumik pinerluttoqarsimatillugu, politiit ilisimannittunik illersuinissaannut, taamaaliornikkut unnerluussamut taassumalu illersuisuanut ilisimannittup aqqanik kalerriussingginnaallutik.**

(Inatsisartunut ilaasortaq Steen Lynge, Atassut)

Siullermik inatsisartuni ilaasortaq Steen Lynge Atassut aalajangiiffisassatut siunnersuutinnut pingaarutilerujussuarmullu qujanaq, imatullu ATASSUT-miit oqaaseqarfigissavarput.

Siunnersuuteqartoq tunngavilersuuteqarnermini ilumoorluinnarpoq, Nunatsinni inuiaqatigiinni hashimik pinerluuteqartarneq ajornartorsiutaasoq annertoq, inuttut sunniuteqarnerluinnarani aningaasartuutaasaqaluni peqqissutsimullu ilaqutariippassuarnullu innarliisartoq. Taamaattumik ATASSUT-miit siunnersuuteqartoq ikiaroonartup matumanilu hashimik eqqussuinerup atuinerullu sakkortunerpaamik inatsisitigut naleqqussaasoqarnissaa tamakkiisumik taperserparput.

ATASSUT-miit Naalackersuisut siunnersuuteqartumut paasinnilluarlutik Kalaallit Nunaannilu eqqartuussisarneq pillugu inatsisip allangortinneqarnissaata anngunneqarnissaalu siunertaralugu, Naalackersuisut danskit inatsisinik atuutsitsinermut ministeri attavigineqarluni suleqatiginiarneqarmat assut ATASSUT-miit tapersiineq isumalluarfigalugulu iluarisimaarparput.

ATASSUT-miit neriutigeqaarput, ilisimannittup illersorneqarnissaanut unnerluussallu illersuisuanut ilisimanittup aqqanik kalerriussisanginnissamik politiit unnerluussisutut kissaatigisaq ataqqiumaaraat. Arajutsisimaneqangilarmi politiit aamma ikiaroonartumik unioqqutitsisimanerni akuusimasutut unnerluutigineqarlutik suliffimminniik tupinnangitsumik peersitaasimasunik.

Taamatut oqaaseqarluta siunnersuuteqartoq qujaffigeqqillugu, aappassaaneerinnginnermi ataatsimiititaliami susassaartumi peqqisaarullugu suliareqqaarnissaa ATASSUT-miit inassutigissavarput.

Qujanaq